

Gvangjsih Gak Dieg Caemh Angqhoh “Ngoenz Vwnzva Caeuq Swyenz Yizcanj”

Bouxbien ciuq: Bineix 6 nyied 14 hauh, dwg daih ngeihcib aen “ngoenz vwnzva caeuq swyenz yizcanj” guek raeuz, aen ciet youqgaenj neix hamz miz gij yawjnaek caeuq cwzyin baujhoh vwnzva yizcanj raeuz, Gvangjsih gak dieg aeu neix guh seizgei cizgiz guh gij saeh lai cungj lai yiengh, baijok lai yiengh caeuq gyaciz vwnzva yizcanj, caux sevei heiqfaenh naekna baujhoh vwnzva yizcanj, daezsang gij eiqsik gak cuz ginzcung baujhoh vwnzva yizcanj.



▲ 6 nyied 12 hauh, Lozcwngz Mulaujcz Swciyen youq minzczu vwnzva gvangjczanz guh hozdung senhconz 2025 nienz “ngoenz vwnzva caeuq swyenz yizcanj”, go ciuhgeq Mulaujcz, foux lungzfiengz daengj gij hanghmoeg feihyiz gaep guekgya, gaep swcigih haenx lienzdaemh yienjok, hawj gyoengqvunz ndaej youq gyawj rox gij yinxdaeuz daegbied hanghmoeg feihyiz.
(Veiz Yuzdai/韦如代)



▲ 6 nyied 14 hauh, Lungzswng Gak Cuz Swciyen youq minzczu gvangjczanz guh hozdung feihyiz senhconz baijok 2025 nienz “ngoenz vwnzva caeuq swyenz yizcanj”, laeb diegbaij dinfwngz guh ndangdaenj Yauzcz, diegbaij Lungzswng Myauzcz dinfwngz guh youzcz, diegbaij dinfwngz guh giuzfwnrumz Duncuz daengj 8 aen dieg, baijok gij cwngzgoj maenhndei hong baujhoh feihyiz Lungzswng, mboujduenh doidoengh vwnzva yizcanj yungz haeuj ndwenngoenz vunzlai, doidoengh cwngzgoj baujhoh leihyung daengxcungq vunz caezyungh.
(Cinz Cinh/秦榛)

6 nyied 13 hauh, Sanhgyangh Duncuz Swciyen Duzdung Cin Mbanjbahdonz guh hozdung 2025 nienz “ngoenz vwnzva caeuq swyenz yizcanj” cienziep daejniemh feihyiz, 20 lai boux mehmbwk caeuq bouxcienziep feihyiz Yangz Yigez hag caebnyumx. Gyoengqde cug cieng baengz hau baenz ndu cimq haeuj ndaw yw' nyumx bae, dawz ok couh nyumx baenz gak cungj dozanq geizheih youh gyaunde. Aen feihyiz hanghmoeg neix miz hawciengz aeyungh, vunzlai cienziep roengzbae hawj “fwngz ceij dinfwngz” bienqbaenz “fwngz ceij ginghci”, coenghrenz lajmbanj cienzmienh saenqhwngh.

(Gungh Bujgangh/龚普康)



6 nyied 12 hauh, Fuconh Yauzcz Swciyen youq minzczu gvangjczanz guh hozdung senhconz baijok 2025 nienz “ngoenz vwnzva caeuq swyenz yizcanj”. Hozdung yienhciegz, 60 lai boux bouxcienziep caeuq lauxsae hagseng doxson doxhag, fouxgyongraez Yauzcz, go mbaj Yauzcz biujyienj, daemj baengzgyaeu Yauzcz, guh aenvenz daengj feihyiz daejniemh, haujlai hagseng comzyawj roxnaeuz doengh fwngz guh, hawj gij vwnzva feihyiz youq ndaw hagdangz miz rengzhoengh moq.

(Yangz Cangzfung/杨长凤 Lij Vwnzsenh/李文萱)

